

Omladinski aktivizam na djelu: Priča o volonterskom poduhvatu za rekonstrukciju sportskih terena u gradu Prijedoru.

Omladinski aktivizam predstavlja izraz volje za konkretnim doprinosom lokalnoj zajednici. Volontiranje je sjajna prilika za mlade ljudi, ne samo za poboljšanje svoje zajednice, već i razvijanje vlastitih potencijala. Uključivanje u volonterske aktivnosti može pružiti nove prilike i inspirirati mlade osobe da budu promjena koju žele vidjeti.

Kroz ReLOaD2 javni poziv za organizacije civilnog društva (OCD) u Prijedoru, podržan je projekat Omladinskog savjeta Prijedor pod nazivom „Rekonstrukcija sportskog terena u srednjoškolskom centru u Prijedor“. Cilj projekta je rekonstrukcija i uređivanje dva terena (za mali fudbal i košarku).

Aleksandra Đaković, predsjednica Omladinskog savjeta, istakla je: „Ideja za projekat postoji već duže vrijeme, djeca srednjih škola u čijoj blizini je sportski teren, nastavu fizičkog vaspitanja imaju na gradskom stadionu koji je udaljen. U skopu ovog kompleksa na čijoj rekonstrukciji radimo kroz sam projekat, nalaze se fudbalski i košarkaški teren, koji bi se mogli koristiti za nastavu fizičkog vaspitanja.“

Mirnes Duratović, predsjednik skupštine Omladinskog savjeta, dodaje da je sportski teren kod srednjoškolskog centra na dobroj lokaciji, s obzirom da je jedini teren u užem centru grada koji je izgrađen i funkcioniše na takav način: „Iako je teren u lošem stanju u njemu svakodnevno borave mladi ljudi od onih najmlađih uzrasta 4-5 godina do onih od 30-35 godina koji ih koriste za sportske aktivnosti.“



Grupa mladih pojedinaca odlučila je preuzeti stvar u svoje ruke i pokušati napraviti uslovnim za korištenje ovaj sportski teren. Njihova priča nije samo o obnovi betona i čelika, već - o obnavljanju zajedništva i ponosa u srcu Prijedora. Iako često možemo čuti kako su mladi danas pasivni i nezainteresovani, ovi mladi ljudi su dokazali da su to samo predrasude.

“Prije svega, podstaklo me je druženje, jer mi sve što radimo, radimo kroz druženje i zabavu. Naravno, svima nama je u cilju da naš grad bude bolje mjesto gdje ima prostora za sve. Smatram da je ovo dobar projekat Omladinskog savjeta koji pomaže poboljšanju uslova života u našem gradu i podsticanja mladih ljudi na sportske aktivnosti i druženje” rekao je Boris, jedan od volontera učesnika u projektu.



Aleksandra, ističe: “Mladi, učesnici/ce i naši volonteri/ke jako su zainteresovani za projekat, sa uključenjem u projekat nismo imali nikakvih problema, niti poteškoća. Probleme smo očekivali samo zbog vremenskih uslova, ali i vrijeme nas je poslužilo, tako da ovih dana radove na terenu privodimo kraju i jako smo zadovoljni krajnjim rezultatima.”

Mirnes i Aleksandra se dugo vremena bave omladinskim aktivizmom, jer ih kako oni kažu profiliše kao osobe, te shvataju da udruženim snagama mogu podstaći napredak lokalne zajednice. Od aktivnosti volontiranja prvo su sprovedene akcije u vidu čišćenja, košenja terena, kako bi se isti pripremio za dalji rad. Zatim su sprovedeni svi građevinski i rekonstrukcijski radovi gdje se ubrajaju postavljanje mreža, reparacija ograda, saniranje šahta, mijenjanje table za košenje i spuštanje koševa na standardnu visinu i svi ostali potrebni radovi.

Aleksandra kaže: “Ovdje posebno želim da se zahvalim radnicima i volonterima koji su radili hladnim i kišovitim danima, kako bi se projekat realizovao na vrijeme, a pored toga odradili su perfektan posao”. Volonteri/ke igraju ključnu ulogu u podršci različitim inicijativama, organizacijama i projektima, doprinoseći svojim vještinama i entuzijazmom. Kroz volontiranje mladi ljudi razvijaju liderstvo, timsku saradnju, komunikacione vještine i empatiju. Omladinski savjet, kao najaktivnija organizacija koja se bavi pitanjima i potrebama mladih u Prijedoru, okupio je 26 volontera/ki, od čega 14 djevojčica i 12 dječaka.





Nikolina, mlada volonterka smatra da se značaj projekta ogleda u tome da će povećati motivaciju mladih ljudi za bavljenjem sportom, jer ovim projektom uređujemo već postojeći prostor i samim tim uređivanjem pokrećemo želju mladih za okupljanjem i sportom, što će takođe dovesti do zdravijih stilova života. Sam projekat dovodi do modernizacije Grada.

U konačnici, omladinski aktivizam predstavlja snagu koja može promjeniti sudbinu lokalne zajednice kao što je Prijedor. Kroz zajedničke inicijative i rad mladi ljudi imaju moć oblikovati pozitivne promjene i stvoriti društvo koje odražava njihove vrijednosti i norme.



Ova inspirativna priča o volonterskom radu naglašava vrijednost angažovanja mladih ljudi u ovakvim inicijativama. Njihov predan rad nije samo transformisao izgled sporstkog terena, već i osnažio duh zajednice. ReLOaD kroz svoj rad uvijek vrlo rado reaguje na glas mladih ljudi i njihove ideje i sugestije.

Projekat "ReLOaD2" finansira Evropska unija (EU), a implementira Razvojni program Ujedinjenih nacija (UNDP) u BiH, uz podršku Grada Prijedor.